

LA PIERE MAGJICHE

E je une zornade cjalde di Vierte. La piçule Inea si je a pene sveade inte sô cjase, sul cucl Massim di Sant Denêl. Come simpri, cuant che al è marcjât, sô mari le lasse lâ ator a curiosâ e duncje ancje vuê di buinore e à pensât di vistîsi ben e jessî, salacor e viôt alc di gnûf o cualchidun che e cognòs par fevelâ un moment.

Il marcjât di Sant Denêl al è simpri un lûc dulà cjatâ di dut: nemâi, verduris, pomis, cjar, formadi, ma ancje vâs, telis, vistîts; il marcjât duncje al è un puest plen di colôrs, ma soledut cun tante int, int di ducj i gjenars e ae piçule Inea i plâs tant la int che a ven a vendi e a comprâ: ducj a rivin su pal troi de fratate e duncje a puartin ce che a puedin, ma simpri novitâts par jê che, par solit, e scuén restâ inte arimanie.

Vuê di buinore la frute e je sigure di cjatâ alc di gnûf e e je cetant contente di podê lâ, ancje se e je simpri di bessole.

Duncje, dopo vê mangjât ce che la mame i à preparât e vêl judade a desaparecjâ la taule inte lôr cjasute di len, dute contente si invie viers il splaç dulà che a fasin il marcjât.

A pene rivade fûr de arimanie, lis vôs, i rumôrs, i odôrs i van incuintri e subit i somee di sveâsi di un sium.

Une vore atente e cjamine tra cuviertis e tendis e e discuvierç simpri robis utilis, come pietins, fuarpiis, pinzutis e curtis, ma ancje bielîs, come solemobii di veri finementri lavorâts o viestis di colôr purpure orladis cun fii di aur. Traviersant il marcjât, i plâs scoltâ sedi lis vôs dai vendidôrs che a invidin la int a comprâ, sedi il cuacarâ des razis; ma i plâs soledut cjâlâ lis gjalinis zirâ a tor libaris, intant che i marcjadants lis seguissin e jessi circondade di chel delicât profum di pan a pene fat, ma ancje di chel fuart odôr di formadi, cussì biel di viodi dongje dai miluçs, des mindusiis e des verduris frescjis, dal lat, dai ûfs e de cjar.

A chest pont, contente di chel che e a cjatât ator, e pense di tornâ a cjase, ma juste in chel e ven incurioside di alc di lusint su di un tapêt: a son piçulis pieris coloradis e lustris.

Fassinade, si svicine e subit un zovin i domande: “Bundî, ti interessial alc?”

Jê, une vore in imbaraç, ma ancje contente che cualchidun finalmentri i feveli, i domande: “Ce che a son chestis pieris? Di dulà vegnino?”

Il frutat, che si presente come Agilulf e che al à plui o mancul la stesse età de frute, dut content par cheste prime cliente de zornade, i conte che lis à cjatadis propit lui, sulis rivis dal lât, inte plane a ovest, lant jù pal troi de fratate, intun lûc avonde dongje. Viodût che la zovine e somee particolarmentri interessade, i regale une pierute di colôr vert smeralt e i dîs che lui al sa de existence di altris pieris, ma in particolâr di cualchidune che si trasforme in alc di gnûf, di maraveôs, ma chest al sucêt nome se e ven bagnade cu la aghe dal lât. La frute, une vore fassinade e entusiaste, i domande di jessi puartade alî des pieris; i doi gnûfs amîs, inalore, a decidin di lâ subit al lât, intant che i gjenitôrs di Agilulf a varessin continuât a vendi alc altri di chel che a àn sul tapêt.

I zovins a cjapin il troi une vore ripit de fratate e si cjatin subit intal mieç dal bosc. La frute, però, si spavente parcè che no je mai passade di li prime e soledut no si je mai cjatade intun bosc cussì fis. Agilulf le console dantji la sô man, ma i dîs ancje che intal bosc dut al è pericolôs, soledut lis creaturis che a vivin alî e che lui al à viodudis plui voltis. E propit intant che al conte di lôr, si sintin vosutis che a vegnin di daûr dai baraçs.

I doi fruts, une vore spaventâts, a scomencin a cori, ma subit, lis creaturis dal bosc, o miôr i sbilfs, ju fermin metintsi a tor a tor e, fevelant cul zovin, i fasin pôre: “Nô o savin che tu tu vegnis dispès achì intal nestri teritori e che tu tu nus robis lis nestri pieris, ma in particolâr nô o savin che tu, vint un cûr pûr, tu sês in grât di distingui chês che a àn dai podês: cjatilis par nô!” a disin in côr cun vosutis fastidiosis.

Agilulf, però, in mût une vore sigûr al rispuint: “No, jo no us darai mai chel che o volês!”. I sbilfs, inalore, ju menacin ducj e doi, disint; “Si pintirês in curt!” e a sparissin. I fruts, une vore spaventâts, a scomencin a cori e intun moment a rivin dongje dal lât. Une volte alî, ancje se une vore preocupâts de menace, a tachin a cirî lis pieris: su la rive sin viodin tantis e tra di lôr a si cjatin ancje chês magjichis, ma al dibisugne vè un voli expert.

Daspò atentis ricercjis, Agilulf 'nt cognòs une: e je ovâl, lisse e ai siei voi e somee, sore di jessi lusint, ancje celeste, come il cîl inte Istât, di chê altre bande par chei altris e je semplicementri grise e compagne di dutis chês altris.

Ancje Inea, che e à un cûr pûr, cumò la viôt cu altris voi e e je dute contente.

I doi, però, ricuardant la menace e vint pôre di jessi cjalâts dai sbilfs, la cjolin sù cence bagnâle e la platin inte borse di dulà che il zovin al tire fûr un cop par bevi e un toc di pan par fâ di mirinde: a chel pont si sentin, cjalant il lât e a cjacarin, zuiant cui claps.

I sbilfs, che oviementri a àn studiât cun atenzion ducj i moviments dai fruts e a àn viodût Agilulf platâ alc inte borse, a profitin de lôr distrazion e, daspò jessisi svicinâts, a vierzin il sacut dal frut, restât in bande e, ducj contents, a puartin vie la pierre.

Sintint ridi daûr di lôr, i fruts si inacuarzin de robarie e Agilulf, cun inteligence e coraç, al ordene a Inea di cjàpâ un got di aghe dal lât intal cop: insiemi a corin daûr ai sbilfs tal bosc; une volte rivâts dongje, Agilulf al tire la aghe viers il sbilf che al à la pierre inte man: magjichementri de pierre bagnade e compâr une biele agane che e slontane i sbilfs, spaventantju e e jude i fruts a tornâ a cjase lant sù pe fratale cence che i abitants dal bosc ur fasin dal mâl.

Inea e Agilulf par ringraziâle, a rompin la pierre cun altris claps plui grancj e cussì la agane e je libare par simpri: jê, di fat, e jere vittime di une magjie une vore fuerte.

I doi amîs, contents par chel che a àn vivût e chel che a àn podût fâ insiemi, a tornin fintremai tal splaç denant de arimanie dulà che a si son cognossûts: a chest pont si saludin, dantsi, dut câs, apontament par une altre matinade di marcjât che magari e deventi une gnove aventure.

Arlêfs di Classe 1^A

cul jutori de Esperte interne di Furlan Docente di Letaris

professore Donatella Bello

Scuele Secondarie di I grât di Sant Denêl

Istitût Comprensîf di Sant Denêl